

Date – 17/04/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Pharmacy Council of India President, Dr. Montu Kumar M Patel-an Mizoram sawrkar in hmunhma a ruahhman sak theih chuan Central lam atanga skill development a training-na hmun sakna tur tum an huam tih a sawi.
2. Poshan Pakhwada hman mekah vawiin khan Mizorama Anganwadi ah te taksa insawizawi pawimawhna leh thei leh thlai ei thatzia inzirtirna hun hman a ni.
3. Union Home Minister Amit Shah-a chuan naktum March ni 31 hmain ramchhunga Naxal helna tih reh vek a ni ang tih a sawi.
4. India-in rampawna smartphone a thawnychhuah chu sawrkar tangka kum hmasa chhung khan cheng vaibelchhe nuai 2 hu a tling.

<><><>

PHARMACY COUNCIL OF INDIA

Pharmacy Council of India President, Dr. Montu Kumar M Patel-an Mizoram sawrkar in hmunhma a ruahhman sak theih chuan Central lam atanga skill development a training-na hmun sakna tur tum an huam tih a sawi.

Aizawl Press Club-ah chanchinbumite vawiina a kawmnaah he thu hi sawiin Dr Monty Kumar Patel chuan Pharmacy Council in thuneihna sang tak a nei a, state council pawh in pharmacist te training leh skill development neih pui reng a tum a ni a ti a. Skill development a awm theihna turin Mizoram Health Minister a sawipui bakah, Mizoram sawrkar in hmunhma a ruahhman sak theih chuan Central lam atanga a training-na hmun sakna tur tum an huam thu he hun ah hian a sawi.

(Byte of President Pharmacy Council)

Dr Monty Kumar Patel chuan Mizoram chhunga Pharmacist post sanction 122 awm chungin pharmacist post ngheta awm mi 25 chiah lak an ni chu pawl a tih thu sawiin, Sawrkar hospital hrang hrangah pharmacist thawktu an in daihlo hle a ni a ti a, Mizoram sawrkar chuan post ruak 97 te chu hnawhkhat thuai se a tih thu a sawi baw.

Mizoram chhunga Drugs hmansual leh damdawi thalo am lutuk te chu veiawm a ti a, Drugs khuahkhirhna a that lehzuah theih nan Food and Drug Administration hnuaia Drug Control Officer sanctioned post 12 a awm laia post nga chiah lak a nih chu pawl a ti in, post ruak tehi hnawh khah vat theih nise a duh thu Dr Monty Kumar Patel chuan a sawi.

He hunah hian RIPANS Department of Pharmacy Head, Dr H.Lalhlemmawia chuan dan hnuaiah Pharmacist te kut ngei atang chauha damdawi dawn theih a nih bakah pharmacist te chuan damdawi an pek rualin damdawi ei dan tur leh side effect awm thei thlengin dawmdawi lei tute chu an hrilh thin tur a ni a. He dan kengkawh tur hian Mizoram State Pharmacy chuan hma a lak mek thu leh Pharmacist zawng zawng te chu damdawi dawra thu vek tura hma an lak thu a sawi a. Pharmacist te damdawi dawra an thut thlap chuan doctor chawh chin chiah damdawi an pek thin dawn avangin drugs ngawl veina intanna pawh a kiam vek a rin thu Dr H.Lalhlemmawia chuan a sawi.

(Byte of Dr H.Lalhlemmawia)

<><><>

AMECC

Mizoram CSS Employees Coordination Committee hruaitute chuan vawiin khan Adviser to Chief Minister Pu Lalmuanpuia Punte hmu in an harsatna tawhte a sawipui.

He hunah hian All Mizoram CSS Employees Coordination Committee hruaitute chuan an dinhmun leh an harsatna tawhte an sawifiah a, Mizoramah CSS hnuaia lak sawrkar hnathawk 10000 chuang an awm thu sawiin hun rei tak ata tawh an dinhmun tha zawka siam a nih theih nan an beih tawh thin thu an sawi a, sawrkarin inhawng taka indawr tawn theihna kawng a buatsaih sak chu lawmawm an tih sawiin, sawrkar chungah pawh beiseina sang tak an neih thu an sawi.

Pu Lalmuanpuia Punte chuan Chief Minister-in CSS hnuaia hnathawkte a ngaih pawimawh thu sawiin an nawrhna sut turin All Mizoram CSS Employees Coordination Committee hruaitute a ngen a, an

harsatna tawhte pawh Chief Minister a sawipui tur thu leh anmahni pawhin Chief Minister an hmuh theih hun remchang siam a nih tur thu a sawi a, an harsatna tawhte chinfel a nih theih nan nawrh an kalpui lai mek sut a dawhkan kila tha taka sawiho a pawimawh thu a sawi, All Mizoram CSS Employees Coordination Committee hruaitute pawhin sawrkarin an harsatnate a ngaih pawimawh sak a inbiakna hun a ruahman avanga lawmthu sawiin boruak tha tak hnuaiah an inkawm a ni.

All Mizoram CSS Employees Co-ordination Committee te hian nimin piah April ni 15 atang khan Pen down strike an kalpui tan a, vawiin hi Pendown Strike tawp ni tur niin AMCECC Pen down Strike hian nghawng a ngah hle a, Education depts hnuai sikul 400 chuanga zirna kalpui theih a ni lova, Mid day meal naupang ten an dawng thei lo a, lehkhabu sem leh zirna kaihnawih dang pawh engmah kalpui theih a ni lo a, Sawrkar office hrang hrang, CSS hnathawk te tam naah chuan hna mumal thawh theih a ni lo a ni.

(DESK)

<><><>

ASI

Archaeological Survey of India (ASI) chuan kumin February ni 25 atanga March ni 1 chhunga Mizoram khaw hrang hranga pipute sulhnu zawna-village to village survey an neihna ah pipute sulhnu lung ker an hmu chhuak a.

Heng lungker te hi Khawzawl, Chawngtlai , Saitual, Serchhip leh Champhai district ami te a ni a, mihring lem te, Sial lu lem te, Sangha lem te ker a ni.

Assistant Superintendent Archaeologist Salam Shyam Singh, K.Lalrinchhani Assistant Archaeologist leh a team te chuan he lung ker hmuhchhuah hi Mizo te tan thil hlu tak a ni a, Mizo hnam rohlu Mizoten Mizoram an luahna ti nghet tu a ni an ti. He lung ker leh lung kerna hmun hi humhalh dan tur ruahmanna ASI lam chuan a la siam dawn a ni.

<><><>

POSHAN PAKHWADA

Poshan Pakhwada hman mekah vawiin khan Mizorama Anganwadi ah te taksa insawizawi pawimawhna leh thei leh thlai ei that zia inzirtirna hun an hmang a,

Serchhipah ICDS Project huaihawtin kawng zawh - Poshan Health Walk on Importance of 1000 Days neih a ni a. Serchhip ICDS Project hian an thawhpui Department hrang hrang te, Anganwadi Worker te leh helper mi 70 te nen Electric Department Office, P&E Veng atanga ICDS Office thleng kawng an zawh a ni.

ICDS Khawzawl Project bultumin taksa sawizawi pawimawhna inzirtiran kea kal leh Fruits & Vegetables Day hman a ni a.

Health Walk hi Khawzawl Vengtharah neih niin CDPO Pi Esther Laltingpui chuan a kaihuai a, hetah hian Anganwadi Worker, naupang leh nu, an vaiin mi 60 vel an thawk chhuak a. Hemi zawhah hian Khawzawl Vengthar YMA Hall-ah Fruits & Vegetables Day an hmang chhunzawm leh a, hetah hian nau pawm leh nau pai te an kalkhawm a. He hunah hian CDPO Pi Esther Laltingpui chuan nu, naupai leh nau pawm te tana chaw tha pawimawhna te tarlangin a bik takin thlai leh thei te tangkaina leh pawimawhna te a sawi a.

Thei leh thlai te hi State dang, hmun hla taktak atanga lak luh aiin tualchhunga thar chhuah, a thar lam te hi an hrisel zawk tih a sawi a. Zuk leh hmuam that lohna te tarlangin Anaemia chungchang te a tarlang bawh.

Vawiin vek khan Women & Child Development Department Hnahthial ICDS Project buatsaihin Anganwadi Center No III-ah 'Fruits and Vegetables Day' hman a ni a, he hunah hian ICDS thawktute, Anganwadi Worker leh Helper-te, Self Help Group hruaitute bakah nu leh naupang te an tel a ni. Programme hman zawh hnu hian Fruits and Vegetables Day pualin kawng zawh nghal a ni.

<><><>

MZP

Mizo Zirlai Pawl MZP hruaituten Mizoram chhung zirna kaihnawih thil hrang hrang leh zirtirtu siksawi mek chungchang sawipuiin Education Minister Pu Vanlalhlana an hmu a.

He hunah hian, MZP General Headquarters hruaitute chuan, tuna zirlai mil a zirtirtu siksawi mek an ni chu tha an ti hle a, zirlai tlem deuh na hmun a zirtirtu indaih vanga lakchhuah leh indaih lohna a dah belh chu tha an tih thu sawiin, zirtirtu sawn chhuah leh siksawi mek te pawh a hmun nuam leh tha Aizawl District-a awm reng beisei lo turin MZP chuan a ngen a ni.

MZP Headquarters, Kolasib, Hnahthial, Champhai leh Mamit te'n an buaina hrang hrang an thlen te pawh bawhzuiin Minister hi sawipui a ni a, zirtirtu indaih lohna zirna in College, Higher, High School, Middle leh Primary a zirtirtu indaih lohna leh hnawh khah la ngaihna pawh file a kal mek thu leh zirlai mil a indaihna ah chuan dah belh kher an tum loh thu Minister hian MZP hruaitute alo hrilh bawh.

Minister chuan, tuna zirlaibu sem mek pawh theihtawp an chhuah thu sawiin, Mizoram sawrkar in nuai 100 chuang an chawi tawh thu a sawi a, MZP hruaitute chuan, zirlaite'n a hun taka lehkhabu an dawn theih nan chak taka hma la zel turin an ngen a, kum danga exam zawh hnu a lehkhabu dawn chauh ang kha kumin chuan thleng tawhlo tura hma la turin an ngen baw.

MZP General Headquarters, Aizawl hruaitute hi MZP Headquarters, Kolasib hruaitute'n an tawiawm a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

MIGOSTU PROTEST

Mizoram sawrkar school zirtirtu inzawmkhawm chuan sawrkar hmasa in zirna hrang hrang dinhmun sang zawka a hlankai te tuna sawrkarin dan siamthat ngai leh fello chhuanlama a paih chu provincialised status ah dah let an phut a, sawrkar laka lungawilohna hrang hrang tarlangin karleh ni 21 atanga ni 25 inkarah an hnathawhna hmunah badge dum an bel vek dawn tih an sawi.

Mizoram Govt. School Teachers Union (MIGOSTU) chuan sawrkar hmasa in dinhmun sang zawka zirna in a hlankaina provincialised status chu tun sawrkar Cabinet thukhawmin a hnawl bakah High School leh Middle School Headmaster kum tam tak lo thawk te zirtirtu pangaia an tlak theihna tur an rawn telh thar an ti a, heng Cabinet meeting in a rel te chu a rang thei ang bera ngaihtuah that leh ni se an duh tih sawiin Provincialised status ah dah let an duh tih an sawi.

MIGOSTU chuan a tehfung an hmanna ah thingtlang leh khawpui inang renga an siam chu diklo an tih thu sawiin thingtlanga school te tan kaisan ve theihna a awm tawh dawnlo nia an hriat avangin dan thar an siam chu sut leh vat turin an phut tih an sawi baw.

<><><>

UNION HOME MINISTER

Union Home Minister Amit Shah-a chuan naktum March ni 31 hmmain ramchhunga Naxal helna tih reh vek a ni ang tih a sawi. Vawiina CRPF dincham vawi 86-na Madhya Pradesh-a Neechmuch-a lawmnaah he thu hi sawiin Pu Shaha chuan Naxal helna ti reh tura beihnaah CRPF te an thawk tha hle tih a sawi a. CRPF te huaisenna ropui tak avangin Naxal helna hi ramchhung ata nuai reh vek a ni dawn tih a sawi a. Pu Shah-a chuan CRPF Cobra batallion ten Naxal awmlohnaa ram siam tumnaah hna ropui tak an thawk a ni a ti baw.

Union Home Minister hian CRPF ram tana nun hlante hriatrengna hun a hman baw a. Sipai martar chhungte chu chhuanawm a tih thu a sawi baw a ni.

(Newsonair)

<><><>

SMARTPHONE

India-in rampawna smartphone a thawnychhuah chu sawrkar tangka kum hmasa chhung khan cheng vaibelchhe nuai 2 hu a tling. Nikum khan smartphone thawnychhuah hi thla 10 chhung chu rampawna bungraw thawnychhuah tam ber a ni a. Union Electronics and IT Minister Ashwini Vaishnaw chuan kum 2013-14 khan India in smartphone a thawnychhuah hi a tam lamah 167 na chauh anih laiin tunah chuan pakhatna a kai tawh a ti a. Kum 2020 khan smartphone siamchhuah kawngah tan lak niin a siamtute hnenah lawmmante siam a ni a. Hei hian nasa takin smartphone siamchhuah a ti pung tih a sawi a ni.

(Newsonair)

<><><>